

Sage

## Ds Seoner Burgfräulein

Dr letschti Graf vu dr Burg Laubsberg, het as Töchterli ka , dia a so schön gsi, dass me ira nur „**Dia schön Kathrin**“ gseit het.

Wo denn dia schön Kathrin alt gnuag isch gsi zum hürota, hent viel jungi, starki und tapferi Ritter um sie gschritta und kämpft, denn alli hend sie wella hürota. Aber dr schöne Kathrin isch keina vu da Ritter guat gnuag gsi. Will si isch zimlich hochnäsig gsi. Dr eint het ira a z grossi Nasa ka , dr ander z klini Ohra, denn het si eina wella nur mit blau Auge, denn eine nur mit bruna Auga. As isch uf jeda Fall nit eifach gsi mit dera schöne Kathrin. Am Schluss het sie denn gseit: „ Jo nu denn nimm ich halt dä klin dick Ritter do, dä mit denna komische rote Backe, wia het dä scho wieder gheissa .... Heinz , Erich, Stefan , Andreas?????“-„Ritter Beno von Trostburg!“het ganz verzweiflet dr Kathrin ira Vater gruafa. „ Heinz oder Beno, isch miar doch glich , d Hauptsach dä het Geld. Und wo dr Ritter Beno, denn hoch zu Ross, ima wunderschöne rote Gwand mit ama Adlerwappe uf dr Bruscht zur Verlobig erschina isch,...(Fanfaren)... isch em dia schön Kathrin ,mit ara Badwanne voll Goldstückli (d Badwanne het Redli ka) entgeztolzirt und het gseit: „ Hoi Heinz e... Beno, also i werda mi mit diar numa verloba wenn gnau glich viel Goldstückli hesch, wia ich in dära Badwanne ...und das sind denn viel!!!

Dr Beno het grossi Auge gmacht und vor luter Stuna het er sMul nüma zuakriagt: „A so viel Gold, a so viel Gold....!“ het er sis Läba lang no nia gseh. As gfunklet und glitzeret und dr klin dick Ritter mit da rota Backe isch überzügt gsi, dass er nia, nia im Leba soviel Gold würd könna uftrieba. Dr Beno het truurig drigluagt uf sinem Ross, und as ischem sogär en klini Träne dia heiss Backe durab grugelet.

Wo er denn au no gseh het, dass dia schön Kathrin het afanga lacha do isch er fuchstüfelswild worda und het gruafa: „Du gemeini blödi Chua, i wünschder, dass Du s Läba lang kei Maa wüsch gfinda wo di möcht hürota. So eini wia Du ...pfui Teufel!“ Dr Ritter Beno het si Ross umagriss, het am spora geh und isch davogaloppiert.

Uf allna Burga rund um Aarau uma het sich natürlich das was passiert isch ganz schnell umagschprocha. Dr Ritter hets am Stallpurscht verzellt, dr Stallpurscht , dr Burgköchin , d Burgköchi, dr Kammerzofa,d Kammerzofa am Schatzmeischter und so witer und so fort.

Uf jeda Fall het „dia schön Kathrin“ s Läba lang kei Maa meh gfunda wo si het wella hürote...jo si isch eifach z hochnäsig und z ibildet gsi und eines Tages.... si isch grad wiederamol am Gold zella gsi, 2345 Jah....also si isch scho zimlich alt gsi ,isch sie gschtorba.

Üsa klin dick Ritter mit da rota Backe het dafür ufara andere Burg a hübschi, liabi Frau kenneglernt, (as Burgfräulein het ma früaner gseit ) und hend bald drufabe ghürote.Viar Täg und Viar Nächt isch dia Hochzeit ganga und Kinder hends au kriagt! 7 im ganze und wenn's nit gschtorba sind, so lebens no hüt.